

ЛОВЬЯ КЫВ

2008 вося лӧддза-номъя 28 лун

2 (26) нелас



Со и воссис Гожся университет.

Лӧддза-номъя 24 лун, нель час рыт. Ставныс чукӧртчисны: гӧсьтьяс пукалӧны нин улӧсьяс вылын, артистъяс дасьӧсь петны сцена вылӧ. А со и Гожся университет воссян рыт нуӧдысьяс: Лилия Чупрына да Ольга Баженова. Найӧ чолӧмалӧны гӧсьтьясӧс да корӧны сцена вылӧ Лидия Логиноваӧс да «Зильган турун» ансамблын сьылысь-ворсысьясӧс: Наталья Траилинаӧс, Пётр Шучалинӧс, Аркадий Исуповӧс. Видзӧдысьяс пӧся вочаалӧны артистъясӧс.

Гожся университетын велӧдчысьясӧс чолӧмалісны Россияса финн-йӧгра культура шӧринӧн веськӧдлысь Светлана Белорусова, Коми республикаса национальной политика да культура министерствоясӧн юрнуӧдысьясӧс вежысьяс Евгений Рожкин да Олег Азаров, печать да юӧр сетан агентствоӧн веськӧдлысьӧс вежысь Элина Максурова, гижысь котырӧн юрнуӧдысь Елена Козлова, художествоа да

документальной гижӧд лабораториясӧн веськӧдлысьяс Владимир Тимин да Павел Симпелев. «Коми войтыр» ӧтмунӧмӧн юрнуӧдысь Сергей Габов воис велӧдчысьяс дорӧ козинъясӧн, республикаса финн-йӧгра культура шӧринын уджалысь Светлана Говорухина лыддис мича кывбур да велӧдчысьяслы сиӧм письмӧ. Сьӧлӧмсянь чолӧмаліс университет воссьӧмӧн финн-йӧгра том войтырлӧн международной ассоциацияса президент Алексей Рассыхаев. Сьӧлӧм вӧрзӧдана сьыланкыв сьыліс Наталья Канова, сӧстӧм сьыланкыв козыналіс Михаил Оверин. А помланыс бара сьылісны Лидия Логинова да «Зильган турун» ансамбль. Сэсся видзӧдысьяс окотапырысь босьталісны налысь автографъяс, снимайтчисны накӧд. Медбӧрын гажӧдіс гитара улӧ ассьыс сьыланкывъяс сьылысь Евгения Удалова. Сійӧ ачыс гижӧ кывбуръяс да бӧрйӧ шылад.

*Диана Прокушева,
Сыктыведін районса Ыб сикт*

**Василий Чупров,
Изьва районса Гам сикт**



Бара рыт. Гожся университетын колис нöшта öти лун. Тані ме аддзи уна выль ёртöс. На костын и Оля Баженова, коми ныв, коді аслас олöмын, менам чайтöм серти, вöчис унатор нин. Со ме и юаси сылысь сылөн олöм, творчество йывсьыс.

– Оля, көні да кор тэ чужин?

– Ме чужи сюрс öкмыссё öкмысдас кыкөд воын Емдін районса Гажакерöс грездын.

– Кутшöм медся тöдчана лоöм-торъяс вöліны тэнад челядьдырся кадö?

– Челядьдырйи мян гортö воывліс пöрысь баб-корысь, и тайö бабыс менö дзолядырйи видзліс. А коркö ме вöлі муна туй бокті и воча туй шöртиыс локтіс сійö бабыс. Ылалöма öтарö-мöдарö чат-расигтыр. Виччысьтöг туй чукыль сайысь мыччысис машина да мöдіс мунны пöчлань. Ме тэрмасьöмөн кеждö бабсö бокö, а сійö нинöм эз и казьявлы, сöмын видзöдіс ме вылö да нюмъяліс вомтырнас. И тайö нюмыс вежис став аттьö-алöмсö. Сэкисянь ме тöда: олöмын нюмыд зэв ыджыд вын.

– Кыдзи тэ чайтан, кутшöмөн колö лоны збыльысь бур кывбурлы?

– Ме серти, кывбурыс сэк вына, кор артмöма шыладысь, кор сійö öти руа, öти ловшыа.

Ме думысь, збыль поэт век шыасьö здукся кылöмлы, быд шы, быд образ йиджö сылы сьöлöмас. А медся ыджыд шудыс поэтлөн – кужны шыяссö да серпассö вайöдны лыддысьысьöдз.

– Оля, кутшöм тэнад олöмад медся ыджыд вермöмыс?

– Медся ыджыдыс менам вöлі таво.

Сэтшöм ясыда да стöча юрö воис мöвп: колö лоны мудрöйөн, колö кужны прöститны быд мортöс. Гөгөрвоны сійöс сэтшöмөн, кутшöм сійö эм. И овнысö сэки кык пöв кокни. Ме лэдзи пытшкөссым став лөксö, öти лунся став көсйöмсö.

Ме казялі: кор сьöкыд, кор дзикöдз нин воштін вынтö, и он нин вермы водзö, кор окота лэдзчысьны, сэки, и сöмын сэк вермасьöмыс помасьö, сэки – ставсö вежысь здук. Сідзкö, колö зэвтчыны – и верман. Ме верми.

– Зэв ыджыд аттьö, Оля. Тэкöд зэв интереснö сёрнитны.

**Ольга Баженова,
Емдін район, Кожмудор сикт**



Ас чужан муын ми олам да вылам,
Ас коми кывнымöс донъялам вылö.
Ас чужан кывнымöс ог на ми вежöй:
Пöльяслөн-пöчьяслөн туйысь ог кежöй!

Кыпöдчам вылöджык!
Зэлöдам борд!
Ставсьыс на вынаджык,
Ён коми морт!

Мед, оз кө ышмöдлы мянöс шондї!
Вөр-ваным, парманым Комисö шонтö!
Кутам на нимаवны му шарыс пасьтала!
Кыпыда борднымöс повтöг ми паськөдам!

Кыпöдчам вылöджык!
Зэлöдам борд!
Ставсьыс на вынаджык,
Ён коми морт!



* * *

Но мый нö шуны тэн?
Мый шуны?
Кор ылі муö бара муна?
Кор кыскö инасьлытöм лов...
А, гашкö, нинöм оз и ков?..

Но сьöкыда тай менам шусис:
«Ме нэм кежлö нин тайö мусьыс...»

Кор висьталöмöй виддзö усис
Да лоис эзысь лысва тусьөн.
Тэ мыччин лысвасö мен бөр,
И кыліс менö ва да вөр,
Кор войтсö видзчысьöмөн юи:
«Ме, вөлöм, весьшөрö тадз шуи...»

**Диана Прокушева,
Сыктыведін районса Ыб сикт**



Таво Гожся университетö локтисны и Коми-Перым кытшысь ныв-зон. Ме сёрнита Надя да Аня Кривощёковаскөд, воча кывъяссö перым-коми кывйөн и вайöда.

– Надя, кутшöмön тэ аддзин Сыктывкарсö? Кажитчис-ö сійö тэныд?

– Сыктывкарын ме казялі сійöс, что быдлаын сöстөм и отир байтоны асланыс кыв вылын. Миян этшöмыс абу. Сыктывкар меным öддьöн гленитчис.

– Кöні тэ велöдчан? Кутшöм классö вуджин? Радейтан-ö гижны? Кутшöм жанръяс тэныд матынöсь?

– Ме велöтча Коми-Пермяцкöй округын, Юсьвинскöй районуын, Архангельск посадын. Ме помалі 9 класс. Ме öддьöн радейта гижны. Ме гижа поэзия жанрын кывбуррез.

– Аня, коді тэно ышöдiс велöдчыны Гожся университетын и кутшöм могөн тэ воин Сыктывкарö?

– Ме гижы кывбуррез «Миян парма» конкурсö. Менам кывбуррез гленитчисö журияслö. И меным оссис возможность локны Сыктывкарö Гожся университетö. Локті ме, мед бы тöдны вильторсö, мед бы гижны виль кывбуррез да велавны гижны лöсьыт-тжыка. А эшö, мед аддзывны Сыктывкар, көдö миян округын ёна ошкöны.

– Матын-ö ас костаныс коми-зыряналөн да пермякъяслөн кывъясыс? Ёна-ö найö торъялöны?

– Коми-пермяцкöй да коми-зырянскöй вачкись-лöны! Медодз лунö ме умоля вежöрті, мый ті байтат, но кык лун бöрті пондi вежöртны унажжык кывсö. Кыввез матынöсь, но эм быдлөн мыйкö аслас. Көр вежöртан этö ассисö мөд кывсис, лоö быдöс кокни-та вежöртана.

– Зэв ыджыд аттö, нывъяс.

Коми-пермякъяс мөд во нöшта на көсйысисны волыны велöдчыны том гижысьяслөн Гожся университетö.

**Надежда Кривощёкова,
Коми-Перым кытш, Юсьва район**



Вон пожум сулалö, отирöс понталö,
Велва вон котöртö, Иньвасö бы вöтö.
Виддзез, кызди саридз, оз тыдав концеыс,
Дона горт – Чинагорт – ме тэно радейта.
Важын ни ме шогми, важын тэно тöда,
Быд тук ветлöма, быд пуок радейта.
Велваын купайтча, вöррезöt гуляйта,
Коми отир тöда, комиön сёрнита.
Ылынö ме муна, а сьölöмö гортын,
Гортö көр ме локта, шондiыс радъялö.
«Мы меным меддона?» – сэки тэ юалан.
«Дона горт – Чинагорт», – ме тэныт висьтала.



**Анна Кривощёкова,
Коми-Перым кытш, Юсьва район**



Мый меным медмуса?
Висьтасыны пондыла.
Сьölöмö кызд пессьö,
Көр муна ме ылö.
Радейта ме гортöс
И быдсö, мый сэтчин.
Кытчö бы эг ветлы,
Горт пыр сьөрö вöтчис.
Вунöтчыны сійö
Ог вермы некөр.
Эд гортын медмуса
Быд ру и быд көр.



Мича вöррез,
Сöстөм видз,
Быдкодъ пöтка да черизэ.
Чожа нем ни эта оз ло,
Этадз кө ми пондам овны.
Вöррез пондамö керавны,
Уввез му вылö колявны.
Быд кыйсисьлö, вöралісьлö
Эта понда мыжа лоас.
Парма горзыны кө пондас,
Кудым-Ошным чожа саймас
Да отсалас, мыйön колö!

**Алексей Епанов,
Коми-Перым кытш, Кудымкар**



Менам гортын эм понок,
Сійö шуöны Дружок.
Сія ласковöй синока,
öддьöн небыт лапаока.
Сія учöt, но и чожд,
Эшö нюксö кызди ош.
Сія вувтö öддьöн дыр,
Киö босьтны тшöктö пыр.
öддьöн понöс ме радейта,
Зэлыта сьölöмын видза.

**Валентина Суворова,
Княжпогост районса Сьоська сикт**



«Анюшаса ань» документальной фильмын висътавсьо Глафира Яковлевна Матвеева йылысь. Чужлөма сійö Сьоськасянь километр сайын сулалысь Анюша грездын. Фильмсö, кöни Глафира Яковлевна казтылö войнаборся сьöкыд вояссö, вöчöма сылön пыис – Михаил Матвеев.

Тайö фильмсö ме видзöдi ловшы кутöмön, сэни висътасьöмсьыс горшöй гöрддзасьлис. Кутшöм жö сэки сьöкыд кадыс вöлöма, мыйта ковмöма нуны ас пельпом вылас крестьяналы – и мужичöйяслы, и нывбабаяслы, пöльяслы и пöчьяслы. Муöдз копыр налы, кодъяс вынсö жалиттöг кыпöдисны мянлысь странанымöс, сетисны олöм öния йöзлы. И зев бур, мый эмöсь сэтшöм пьян, кодъяс радейтöны мамъяснысö да батъяснысö. Торъя аттьö Михаил Николаевичлы сыысь, мый сійö аслас мам пыр петкöдлис республикаса став аныслысь, кодъяс том олöмсö аддзывтöг ки пуктывтöг уджалисны мян Чужан му вöсна, олöмсö.

Ия Ладанова,

Кöрткерöс районса Шойнаты сикт




Иван Ильич Белых чужлөма Сыктывдiн районса Паль сиктын 1946 воö. Школаас велöдчигön радейтöма алгебра, геометрия, история да литература урокъяс. 1969 воын помалöма пединститут. Гижнысö сійöс ышöдöма Иван Григорьевич Торопов, а газетö уджавны корöма Василий Егорович Кушманов. Сійö тшöктöма дасьтыны Иванлы гижöд, мöдыс гижöма да сетöма видзöдлыны Кушмановыслы. Бöрсö босьтöма да аддзöма, мый сійö ставсö черкйöдлöма гöрд пастаөн. Дерт жö, Иван Ильичлы лöма öбиднö.

Газетын уджалигön Иван Ильич тöдмасьöма уна бур журналисткöд. Ветлöма командировкаясö, а медводдзаыс вöлöма Пожöгö, сэсся Изьваö, Печораö, Луздорö, Койгортö... Тöдмасьöма выль йöзкöд.

Иван Белых – сиктса олысь, сылы тöдса колхозын удж, радейтö гуляйтны вöртi, сiдзжö сылы зев кажитчöны вöвъяс. Тайö ставыс отсалö сылы гижны мича да збыль произведенияяс. Вöлöма олöмас и уна серамбанатор. Гижны кö пö ставсö, дзöнь небöг лоас. Уна юалöм майшöдлö сійöс: мый лоас вөр-ваыскöд некымын во мысти; коляс-ö коми войтырыс; мöдасны-ö водзö сёрнитны йöзыс коми кыв вылын? Сiдзжö майшöдлö сійöс олöм да кулöм.

Иван Ильич нималö мян Коми Республикаын. Сiйö пырö гижысьяс котырö, 2007 воын сылы сетлöмаöсь Шолохов нима медаль. Иван Белыхлön эм и республикаса культураын заслуженной уджалысьлön ним.

Со öд кутшöм морт олö мянкöд öти кадö.



Артур Ермаков,
Коми-Перым кытш, Коча район, Пелым сикт



Пелым посадын важын ни ме ола
И бура тода быдкодъ пельӧсок.
Кытӧн пук, гӧпок,
кытӧн котӧртӧ неыджыт шорок,
Чудской колодец сӧдза чӧскыт ваӧн.
Туй бокын памятник сулалӧ,
кыдзи столб.
А сӧдз Пелымӧ – родина учӧтик...
Любимӧй, светлӧй гажа менам горт.




Керӧс вылын коркӧ тӧ чужин,
Старинной деревня Пелым.
Тӧ жагвыв зорамин и быдмин,
Любимӧй деревня Пелым.
Коркӧ шондӧ тӧ сайӧ пуксьывліс,
И эз куслы некӧр тэнат ӧд.
Быдса вексӧ уджалан и только.
Тӧнӧ, дона, некӧр ог вунӧт.

Ольга Габова,
Кӧрткерӧс район, Одыб сикт

* * *

Олӧмас мен медся муса
Аслам Коми му:
Тист Гӧраыс, Кирӧ поскыс,
Векни Нывсер ю.
Сӧні ставыс эм, мый колӧ,
Радлы, уджав, ов.
Быдты челядь, сӧвмӧд олӧм,
Кыпӧд ассьыд лов.

Мария Николаева,
Кулӧмдін района Пожӧг сикт



Ӧтчыд менӧ мамӧй зӧв
ӧна видіс. А делӧыс вот
мыйын.

Дас час рыт. Ме локта
гуляйтанинысь. Кок улӧ ог и
видзӧдлы. Друг ме мыйӧкӧ
крукаси да няйт пиад и уси.
Локта гортӧ дзоньнас няйт.
Бӧрда. Мамӧ кутіс пинявны
менӧ. Ставныдлы, кӧнкӧ,
ковмывліс кывлыны, кыдзи
пинясьӧ мам. А мыйла сійӧ
пинясьӧ, юаланныд ті?

Ӧд сійӧ пинясьӧ оз лӧк
вылӧ. Быд мам кӧсйӧ, ме-
дым сылӧн ныв ли пи быд-
мис бур да шань мортӧн. А
кутшӧм мелі тайӧ кывйыс –
мам. Мам сетӧ миянлы
вежӧр овны. Мам – тайӧ
медводдза кыв, кодӧс шуӧ
дзоля кага. Некод, мам кын-
дзи, оз вермы сӧтшӧма ра-
дейтны миянӧс. Мам эм
кӧть кутшӧм. Мамыд ӧти.
Мӧд татшӧмӧс он аддзы.
Ме чайта, мый медся дона-
ыс му вылас мам! Мелі,
муса, шань мам! Сійӧ вӧчӧ
ставсӧ, медым ми быдмим,
сӧвмим да лоим бур йӧзӧн.

Да, мамыд пинясьлӧ,
мукӧддырйи ошкывлӧ. Но
мам мам и эм. Мам некор
лӧкӧ оз велӧд.

Ме кӧсья сины аслам
мамлы – медым сылӧн вӧлі
ыджыд дзоньвидзалун, мед
сійӧ вӧлі мича да шань, мелі
да муса. Став бурсӧ тӧныд,
муса мамук!



Ӧтчыд гожа асылӧ ми
мӧдӧдчим вӧрӧ пув вотны. Пуксим
машинаӧ да журкнитім Кулӧмдінса
туй кузя матысса пожӧма ягӧ. Чеччим
да пырим вотчыны. А пувйыс! Пев
пом гырся! Мамӧ горӧдіс: «Коді мед-
водз эштӧдас – сылы козин!» Кӧсйи
эськӧ медводзӧн тыртны дозйӧс, да
видзӧдлі Максим вок вылӧ. Бергӧд-
чи, а сійӧ абу. Быдлаысь видзӧдалі –
некысь эг аддзы. А сійӧ кайӧма пу
вылӧ. Висьталі мамӧлы, сійӧ и
кывкӧрталіс, ӧблезяна пӧ. А миян
Максим збыльысь ӧблезяна воӧ чу-
жис. Сійӧн, кӧнкӧ, быдлаӧ и кавшасьӧ.

Сӧсся гонькнитлі мамлӧн дозъ-
яс. Видзӧда, а сылӧн ведра джынй-
ыс нин. Видзӧдлі батьӧлӧн дозъяс.
Сылӧн весиг пыдӧсыс абу на саймов-
тчылӧма. Менам нинӧм на абу. Тӧрыб-
джыка мӧді вӧрӧдны чуньясӧн. А
кӧсьянынӧд тӧдмавны, мыйла менам
мамӧй сӧтшӧм ӧдйӧ вотчӧ? Сы вӧсна,
мый сылӧн мамыс (менама ыджыд
мамӧй) зӧв ӧдйӧ шаркӧдӧ-вотчӧ.
Мӧжгигкӧсті сылӧн ведраыд тыр нин.
Думышті ме ставнысӧ ордйӧдны. Пук-
си усьӧм пу вылӧ да заводиті ректы-
ны пувйӧс, мый чукӧрті нин. Пыдӧсас
тӧчи еджыд нитш, а вылас тӧчи пув.
Делӧвӧя шавксьӧді сӧтчӧ, кӧні бать-
мамӧй вотчӧны, ачым ылісянь горза:
«Ура! Ме медводзӧн дозйӧс тырті!» А
мамӧ и шуӧ: «Тыртін кӧ, ну да кысьт».

А меным и яндзим кысьтнытӧ.
Ведро пыдӧсас ӧд нитш. Куті мӧвпав-
ны, мый водзӧ вӧчны. Ректынысӧ куш
пувсӧ, а нитшсӧ шыбитны. Пувйыд
этша лӧӧ. Мамӧ локтас да юасьны
пондас: «Мый нӧ, ведра тыр пув вӧлі,
а кысьтӧмыд да быттьӧ ведра пыдӧ-
сас и вӧлӧма». А ӧктынытӧ дзонь вед-
ра пув дыр да и дыш. Мамӧ суӧдны

вермас. Нинӧм вӧчны: ковмас вись-
тасьны. Муна и быттьӧ бӧрда. Аслам
весиг синва войт оз усь. Мамӧ, дерт,
юалас, мый нин лоин?

– Менам ведра пыдӧсад пув ме-
стаад нитш, – шуа ме.

– Мый сӧсся тӧкӧд вӧчан. Но,
кӧні ӧстальной пувйыд? Уна вӧлі вот-
ӧмыд да, – юасьӧ мам.

– Ӧстальной пувйыд, мамук,
вомӧ лӧбыштіс, пӧтмӧн лои.

Миян сӧрнитігкӧсті батьӧй дзонь
10 литраа ведра вотӧма. Дарӧм мам
век вӧлі дивитӧ: «Медся ньӧжмыда
вотчан». Со тай, ньӧжмыда вотчысь-
ыд кыдзи парснитіс миянӧс. Весиг
сюсь киа мамӧс ордйӧдіс. Ӧдӧбтім ми
мӧд ведра тыртны. Ставныс вотчӧны,
сӧмын ме сулала, ог вотчы. Видзӧда,
мый Максим вӧчӧ. А сійӧ босьтӧма
ассыс дозсӧ да чукӧртӧ сӧтчӧ пожӧм
кольяс, чӧд чукӧртыштӧма да быдся-
ма быдмӧгссӧ. Дзоля кагаыдлы шог-
мас. Рытӧдзыд куимӧн ми вель уна
чукӧртім: ванна, нель ведра да таз
чукъясис. Ӑна жӧ и мудзим талун,
но сӧлӧм вылын долыд. Меным зӧв ӧна
кажитчис пувла ветлӧмыс. Лоас
мыйӧн чӧсмасьны тӧлын.

Кӧсья помавны ассьым висьтӧс
Василий Лодыгинлӧн «Меддона
морт» кывбурсысь юкӧнӧн, сійӧ лӧсялӧ
менама семьялы:

*Тайӧ му вылас ставыс мен дона,
Эжва ю, парма йир, кыддза рас.*

*Натӧг сӧлӧмӧй некор оз шонав,
Натӧг морӧсам быттьӧкӧ тас.*

*Но и донаысь-донаяс эмӧсь,
Медся донаыс му вылын мам,
Коді сетіс мен овнысӧ эбӧс,
Коді сетіс мен овнысӧ сям.*

Ирина Игнатова,
Куломдін районса
Помӧсдін сикт



Ола ме Помӧсдін сиктын. Дерт, озыр сълӧн историяыс. Сиктнм миян зэв нин важся. Сюрс сизимсӧ квайтӧд воын татчӧ медводдзаысь локтӧмаӧсь да овмӧдчӧмаӧсь йӧзыс.

Ме асьым сиктӧс ог кут ошкыны, сы вӧсна мый чужан сиктыд век дона, радейтана. Кора тӧнӧс ветлыны мекӧд экскурсияӧн. А сӧсся асьныд нин мӧвпыштӧй, кажитчӧ-ӧ тӧянлы менам сиктӧй.

Сӧмын мир туй кузя на кутанныд локны, а вель нин мичаа, зумыда сулалӧ кыр вылын Помӧсдін. Визувтӧ Помӧс ю, гажӧдӧ миянлысь синнымӧс. Пыр син водзаныд сувтӧ вичко. Сӧйӧ зэв нин важ да ӧнӧ выльӧс лӧптӧны.

Ветламӧй водзӧ. Туй бокын сулалӧны пуысь вӧчӧм керкаяс, лавкаяс, апетка. Жежалам кӧ бокӧ, аддзам Вениамин Тимофеевич Чисталӧвлысь керкасӧ. Сӧйӧ сулалӧ зумыда на, быттьӧ миянлы тӧд вылӧ уськӧдӧ, мый тайӧ сиктас чужлис да кокнас тувчалӧс тӧдчана коми гижысь. Тан гӧгӧр на ӧвтӧ Тима Вень «кӧрӧн». А со и нӧмӧвӧйся пуяс, кодъясӧс садитлӧма аслас киӧн гижысь.

Со школа, кӧнӧ велӧдчӧны витӧд да квайтӧд классъяс. Кужис кӧ керкаыс сӧрнитны, унатор эськӧ миянлы висьталӧс. Сы йылысь, мый танӧ овлис татчӧс помещик Езеким Порошкин. Сы йылысь, мый танӧ кывкутӧдисны, а сӧсся и нуисны вины Домна Каликоваӧс. Помӧсдінын эмӧсь и Домна Каликовалы, и Тима Веньлы памятникъяс. А нӧшта на миян Помӧсдінӧ усьлӧма метеорит. Сӧйӧс аддзӧмаӧсь татчӧс велӧдчысьяс.

А кутшӧм жӧ мича пожӧма вӧрыд Помӧсдінад! Волӧй да видзӧдлӧй.

Ме, дерт, асьым сиктӧс радейта. Кӧсъя, мед сӧйӧ пыр сӧвмис. Да нӧшта пӧся кора ставнытӧ Помӧсдін сиктӧ гӧсьтитны.

Ия Ладанова,
Кӧрткерӧс районса
Шойнаты сикт



Ми, «Олӧм гижысьяс» котырса ныв-зон, сӧрнитӧм «Коми му» газет редакция» холдингса веськӧдлысь Александр Ульяновкӧд да со мый тӧдмалӧм.

Александр Васильевич чужлӧма Куломдінын, но чужаніннас лыддӧ Дереваннӧй сикт. Сълӧн эм кык чой, мамыс уджавлӧма перкарняын, сӧсся больничайн санитаркаӧн. Батьыс – участкӧвӧйӧн. Батьыс вӧлӧма и война вылын.

Школаас Александр Ульянов велӧдчылӧма бура, ветлывлӧма кружокъяс вылӧ. Школаас велӧдчигас нин гижлӧма кывбуръяс. Водзӧ велӧдчыны мунӧма пединститутса коми юкӧнӧ. Асьянь пасъя, мый группасыс сӧмын Александр Васильевич уджалӧ ӧнӧ газетын.

А кодӧ нӧ ышӧдӧма сӧйӧс босьтчыны тайӧ уджас? Вӧлӧмкӧ, Василий Егорович Кушманов. Вит во Александр Ульянов вӧлӧма «Красное знамя» газетса корреспондентӧн, уджавлӧма «Югид туй» газетын, сӧсся вит во – Коми книжнӧй издательствоын, «Би

кинь» журналын. Ӧти во вӧлӧма чина мортӧн, да эз пӧ кажитчы, вывти нин аслыспӧлӧс уджыс да. Веськавлӧма и шахтаӧ, мед гижны из шом перйысьяс йылысь, кодъяс Виль вӧсӧ пасйивлӧмаӧсь удж вылас. Бӧрас аслыс шуӧма, мӧдысь пӧ татчӧ сӧсся ог лок.

А кор заводитӧма гижнысӧ? Да дядьыслӧн Хабаровскысь локтӧм бӧрын. Сӧйӧ висьталӧма племянникыслы экспедиция йылысь, а мӧдыс та йылысь гижӧма. Тадзи и заводитчӧма гижан уджыс. Асьӧ гижысь лыддӧ лирикӧн.

Медся радейтанаторйыс – чери (стӧчджыка кӧ – кельчи) кыйӧм, ном вердӧм (тайӧс висьталӧм ачыс сералӧ) да тшак вотӧм. Медся радейтана гижысьясыс – Иван Торопов, Геннадий Юшков да Шахов.

Висьталӧс, мый компьютерӧн оз вӧдитчы, став гижӧдсӧ ки помысь гижӧ, тадзсӧ пӧ сӧйӧ бурджык артмӧ.

Ыджыд аттьӧ Александр Васильевичлы миянкӧд сӧрнитӧмысь.



Том гижысьяслӧн кӧкъямысӧд Гожся университет

«Ловъя кыв», 2 (26) петас

2008 вося лӧддза-номъя 28 лун

Адрес: Сыктывкар, Ленин нима улича, 73 керка, Россия Федерацияса финн-йӧгра войтырлӧн культура шӧрин

Редколлегия: Ирина Игнатова, Анна Козлова, Ия Ладанова, Вера Логинова, Юлия Морокова, Алексей Печеницын, Диана Прокушева, Валентина Суворова, Алина Филиппова, Василий Чупров

Петас вӧсна кывкутысь – Павел Симпелев